



23. April 2024

UPA2024/69

Nunatta imartaani angalasut tamarmik EPIRB-mik, piumasaqaatit, peqalernissaat anguniarlugu Naalakkersuisut naalagaaffimmuut saaffiginnissuteqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen Jensen, Siumut)

Siumumiit Doris J. Jensen imaattumik siunnersuuteqarninni qutsavigaatsigit.

Siunnersuuteqartup aallaqqaasiinermini oqariartuutai issuarlaarlugit oqarusuppugut, qassimmitaava ajunaalernerimi kalerrisaarummik peqartaraluarpata annaassiniarnerit ikinnerusimassagaluarpat, piffissarlu atorpeqartartoq aamma ajornerugaangami ilaatigut inuunermik naleqarsinnaasartoq pinngitsoorsimasinnaagaluarpat.

Siumumiit siunnersuuteqartoq ilalerlugu, immami Inuussutissarsiuteqartut soorlu takornariartitsisartut, inunnik ilaasoqarlutik angallassisartut assigalugut aalisariutinut piumasaqaatinut ilanngunneqarsinnaanerata nalilersorluarneqarnissaa, allatuulli akuersissuteqarniarunik piumasaqaatinut nalinginnaalluinnartumik EBIRB qullasissumik piumasaqaatinut ilanngunneqarsinnaasutut nalilersugassaasoq siumumiit isumaqarpugut. Ilangullugu aamma AIS (sumiiffimmik nalunaarsuut) piumasaqaatinut ilanngunneqarsinnaasutut nalilersuinerimi kissaatigaarputtaaq. Taakkartorneqartut aningaasanik nalitungaatsiarput, kiap kikkut qanorlu aningaasalersorneqarnissaat ilanngullugu eqqarsaatigisariaqarpagut, siunnersuuteqartup tungavilersuummini nalingi taaneqartut annikinngimmata, aalisarnermik piniarnermik inuussutissarsiuteqartunut aallartinniarnermi oqaamaassinnaanera eqqarsaatigalu.

Oqareernittuut siunnersuuteqartup anguniagaa Siumumiit tamakkiisumik paasisinnaalluaratsigu. Isumaqaratta tassuuna aamma immami isumannaatsumik inuussutissarsiutilinnut pineqartunut piumasaqaataalerneratigut upalungaarsimaneq angallannikkut anguneqarsinnaasoq. Isumannaallisaneq eqqarsaatigalugu angalasartorpassuarnut kaammattuutigerusunnarpoq Sumiissusersiutit Attaveqaatitallit Ajunaalernermilu Kalerrisaarisartut (INREACH) pigineqarnissinnaammata. Qujanartumilli angalasartorpassuarnik massakut atugaaleraluttuinnarluni tamanna pitsaasuvoq, taamaattumik upalungaarsimanikkut piumasaqaatit qanorpiaq ittuunissaannik siunnersuuteqartutuut siammasinninngorlugu ataatsimiititaliami eqqartorluarneqarnissaa Siumumiit kissaatigaarput.

Taamatut oqaaseqarluta Sanaartornermut Attaveqaasersuutinullu ataatsimiititaliami eqqartorluarneqarnissaa innersuussutigaaarput.

Lars Poulsen, Siumut